



KEMENTERIAN EKONOMI
JABATAN PERANGKAAAN MALAYSIA

KENYATAAN MEDIA
BAGI PRESTASI PERUSAHAAN MIKRO, KECIL DAN SEDERHANA (PMKS)
MALAYSIA 2023

**KDNK PMKS berkembang 5.0 peratus, menyumbang 39.1 peratus
kepada ekonomi Malaysia pada 2023**

PUTRAJAYA, 26 Julai 2024 – Jabatan Perangkaan Malaysia (DOSM) menerbitkan statistik Perusahaan Mikro, Kecil dan Sederhana (PMKS) Malaysia bagi tahun 2023. Statistik PMKS ini memperincikan sumbangan PMKS kepada ekonomi dari segi Keluaran Dalam Negeri Kasar (KDNK), Eksport dan Guna tenaga.

Aktiviti berkaitan pelancongan yang semakin rancak memberi kesan positif kepada pertumbuhan PMKS, yang mana majoriti PMKS tertumpu dalam sektor Perkhidmatan, terutamanya perdagangan borong & runcit, makanan & minuman, penginapan dan pengangkutan. Berdasarkan Survei Pelancongan Domestik 2023, jumlah perbelanjaan pelawat domestik di Malaysia telah meningkat 32.5 peratus pada tahun 2023 berbanding tahun sebelumnya. Tambahan lagi, bilangan ketibaan pelancong asing telah meningkat dua kali ganda pada tahun 2023. Di samping itu, inisiatif kerajaan untuk meningkatkan keupayaan dan kemampuan serta daya saing PMKS di pasaran global turut menyokong pertumbuhan mereka.

KDNK PMKS Malaysia mencatatkan pertumbuhan 5.0 peratus pada tahun 2023 dengan nilai ditambah berjumlah RM613.1 bilion atau 39.1 peratus daripada KDNK Malaysia. Pertumbuhan PMKS juga mengatasi KDNK Malaysia iaitu 3.6 peratus pada tahun 2023. Sebagai perbandingan, KDNK PMKS melonjak 12.3 peratus pada tahun 2022 dengan nilai ditambah sebanyak RM584.1 bilion.

Menurut Ketua Perangkawan Malaysia, Dato' Sri Dr Mohd Uzir Mahidin, "Sektor Perkhidmatan dan Pembuatan merupakan penyumbang utama yang merangkumi 84.8 peratus daripada KDNK PMKS. Sektor Pertanian menyumbang 9.1 peratus kepada KDNK PMKS, diikuti oleh sektor Pembinaan (4.5%) dan Perlombongan & pengkuarian (0.5%)."

Sektor Perkhidmatan meningkat 6.5 peratus pada tahun 2023 berbanding 17.2 peratus pada tahun sebelumnya. Prestasi ini disokong oleh pertumbuhan yang stabil dalam subsektor utama, iaitu Perdagangan borong & runcit, makanan & minuman dan penginapan (5.7%); Kewangan, insurans, hartanah & perkhidmatan perniagaan (6.3%); dan Pengangkutan & penyimpanan dan maklumat & komunikasi (10.6 %).

Sektor Pembuatan merekodkan pertumbuhan 1.5 peratus (2022: 6.0%) dan dipengaruhi oleh pertumbuhan positif dalam subsektor Makanan, minuman & tembakau (5.0%); dan Produk mineral bukan logam, logam asas & produk logam yang direka (5.3%).

Nilai ditambah PMKS dalam sektor Pertanian meningkat 1.3 peratus pada tahun 2023, lebih tinggi daripada pertumbuhan 0.9 peratus pada tahun sebelumnya. Prestasi ini disokong oleh subsektor Getah, kelapa sawit, ternakan & pertanian lain (1.8%) dan Perikanan (0.5%). Sementara itu, nilai ditambah PMKS bagi sektor Pembinaan dan Perlombongan & pengkuarian masing-masing turut berkembang 5.8 peratus (2022: 5.0%) dan 4.9 peratus (2022: 10.7%).

Eksport PMKS

Dari perspektif perdagangan luar negeri, Dato' Sri Dr. Mohd Uzir Mahidin turut menyatakan, "Eksport PMKS berjumlah RM152.2 bilion dengan pertumbuhan 4.5 peratus pada tahun 2023, lebih perlahan berbanding 17.2 peratus yang direkodkan pada tahun sebelumnya. Ia dipengaruhi terutamanya oleh sektor Pembuatan dengan penurunan 0.7 peratus (2022: 19.5%). Walau bagaimanapun, sektor Perkhidmatan dan Pertanian menunjukkan prestasi kukuh, berkembang 24.2 peratus (2022: 8.8%) dan 13.7 peratus (2022: 15.5%) masing-masing telah mengimbangi impak kepada keseluruhan prestasi eksport PMKS. Eksport PMKS merangkumi 12.2 peratus kepada jumlah eksport, dipacu oleh sektor Pembuatan (9.0%), diikuti Perkhidmatan (2.8%) dan Pertanian (0.3%)."

Eksport PMKS bagi sektor Pembuatan mencatatkan nilai RM113.1 bilion pada tahun 2023 (2022: RM113.8 bilion). Pemangkin utama kepada sektor ini adalah barang-barang keluaran kilang, pelbagai barang keluaran kilang dan jentera & peralatan pengangkutan. Singapura merupakan negara destinasi utama bagi eksport PMKS sektor Pembuatan dengan sumbangan 18.4 peratus, diikuti oleh China (14.2%) dan Amerika Syarikat (11.3%).

Eksport PMKS sektor Perkhidmatan meningkat kepada RM35.4 bilion pada tahun 2023 berbanding RM28.5 bilion pada tahun sebelumnya. Eksport Perkhidmatan PMKS dipacu terutamanya oleh perkhidmatan perniagaan lain, perjalanan dan pengangkutan.

Sementara itu, eksport PMKS bagi sektor Pertanian bernilai RM3.7 bilion dengan sumbangan 2.4 peratus daripada jumlah eksport PMKS pada tahun 2023. Sektor ini mencatatkan pertumbuhan 13.7 peratus didorong oleh peningkatan dalam eksport ikan hiasan, ayam/ itik dan perikanan dengan nilai RM1.1 bilion berbanding RM0.8 bilion pada tahun 2022.

Guna Tenaga dan Produktiviti PMKS

Ketua Perangkawan Malaysia menjelaskan “Guna tenaga PMKS terus mencatatkan peningkatan dengan pertumbuhan tahunan yang lebih perlahan 3.5 peratus berbanding 3.8 peratus pada tahun 2022, untuk merekodkan sejumlah 7.86 juta orang (2022: 7.59 juta orang). Sehubungan itu, sumbangan guna tenaga PMKS kepada guna tenaga Malaysia pada tahun 2023 adalah 48.5 peratus, meningkat 0.3 mata peratus berbanding tahun sebelumnya (2022: 48.2%).”

Mengikut aktiviti ekonomi, guna tenaga PMKS dalam sektor Pertanian menyumbang 42.5 peratus daripada keseluruhan guna tenaga dalam sektor ini, meningkat 1.0 peratus kepada 795 ribu orang pada tahun 2023. Bagi sektor Perlombongan & pengkuarian, guna tenaga PMKS menyumbang 27.5 peratus atau 21 ribu orang, mencatatkan pertumbuhan marginal 0.1 peratus dalam tempoh tersebut. Sementara itu, bilangan guna tenaga PMKS dalam sektor Pembuatan mencatatkan peningkatan 2.4 peratus kepada 1.28 juta orang, tetapi dari segi sumbangan, ianya berkurang 0.2 mata peratus kepada 45.7 peratus pada tahun 2023.

Guna tenaga PMKS dalam sektor Pembinaan menyumbang 48.3 peratus daripada keseluruhan guna tenaga dalam sektor ini untuk merekodkan sejumlah 675 ribu orang, meningkat 0.9 peratus tahun ke tahun. Penyertaan guna tenaga PMKS dalam sektor Perkhidmatan dilihat terus berkembang sepanjang tahun ini, menyumbang 50.6 peratus daripada jumlah guna tenaga dalam sektor Perkhidmatan. Guna tenaga PMKS dalam sektor ini meningkat 4.5 peratus kepada 5.09 juta orang, sebahagian besarnya disumbangkan oleh peningkatan dalam subsektor perdagangan borong & runcit, makanan & minuman dan penginapan.

Ketua Perangkawan seterusnya mengulas berhubung prestasi produktiviti buruh PMKS bagi tahun 2023, “Produktiviti buruh PMKS yang diukur sebagai nilai ditambah per pekerja meningkat 1.5 peratus untuk mencatatkan nilai produktiviti sebanyak RM78,035 per pekerja (2022: RM76,919 per pekerja). Pertumbuhan tertinggi produktiviti buruh PMKS direkodkan oleh sektor Pembinaan (4.9%) diikuti sektor Perlombongan & pengkuarian (4.8%), Perkhidmatan (1.9%) dan Pertanian (0.3%). Manakala, produktiviti buruh PMKS dalam sektor Pembuatan mencatatkan pertumbuhan negatif 0.9 peratus berbanding peningkatan 2.9 peratus pada tahun sebelumnya.”

Embargo: Hanya boleh diterbitkan atau disebarkan mulai jam 1200, Jumaat, 26 Julai 2024

Jabatan Perangkaan Malaysia (DOSM) telah melancarkan OpenDOSM NextGen sebagai medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

DOSM sedang menjalankan Banci Pertanian 2024. Sila layari <https://www.myagricensus.gov.my> untuk maklumat lanjut. Tema adalah “Banci Pertanian, Kunci Kemajuan Pertanian.”


Kerajaan Malaysia telah mengisytiharkan Hari Statistik Negara (MyStats Day) pada 20 Oktober setiap tahun. Tema sambutan MyStats Day adalah “Statistik Nadi Kehidupan”. DOSM menyambut ulang tahun ke 75 Jubli Intan pada tahun 2024.

Dikeluarkan oleh:

**PEJABAT KETUA PERANGKAWAN
JABATAN PERANGKAAN MALAYSIA
26 JULAI 2024**

LAMPIRAN


Carta 1: KDNK Malaysia, PMKS dan Bukan PMKS bagi 2001-2023 pada Harga Malar – Perubahan Peratusan Tahunan



Nota:


- ¹Pertumbuhan KDNK PMKS berdasarkan Definisi Baharu KDNK PMKS bagi 2014 berbanding Definisi Lama KDNK PMKS bagi 2013
- ²Pertumbuhan KDNK PMKS berdasarkan Definisi Baharu KDNK PMKS bagi 2014 berbanding Definisi Baharu KDNK PMKS bagi 2013
- ³Pertumbuhan KDNK Bukan PMKS berdasarkan Definisi Baharu KDNK PMKS bagi 2014 berbanding Definisi Lama KDNK PMKS bagi 2013
- ⁴Pertumbuhan KDNK Bukan PMKS berdasarkan Definisi Baharu KDNK PMKS bagi 2014 berbanding Definisi Baharu KDNK PMKS bagi 2013

Carta 2: Nilai Ditambah dan Sumbangan KDNK PMKS kepada KDNK Malaysia bagi 2016-2023 pada Harga Malar 2015




LAMPIRAN


Carta 3: Peratus Sumbangan 2023 dan Perubahan Peratusan Tahunan Eksport PMKS mengikut Sektor bagi 2016-2023



Carta 4: Bilangan Perubahan Peratusan Tahunan Guna Tenaga bagi 2016-2023



Carta 5: Bilangan PMKS Mengikut Negeri, 2023



Carta 6: Peratusan PMKS Mengikut Sektor, 2023

